

Visoki predstavnik poziva na uspostavljanje Komisije za rad na budućoj organizaciji Mostara

Tokom svog posjeta Mostaru u petak, Visoki predstavnik, Pedi Ešdaun, dao je podršku planu za uspostavljanje Komisije koja će izraditi sveobuhvatan prijedlog za političku i administrativnu budućnost ovog grada.

“Jasno je da su građani i vlasti Mostara prepoznali potrebu za reformom. Postoji saglasnost oko toga da je došlo vrijeme da grad Mostar napravi odlučan korak naprijed”, rekao je Visoki predstavnik tokom susreta s gradonačelnikom i zamjenikom gradonačelnika Mostara, gospodom Hamdijom Jahićem i Ljubom Bešlićem, te s članovima Gradske skupštine Mostara.

Visoki predstavnik je takođe predložio da sastav Komisije bude višenacionalan, kao i da članovi komisije budu osobe iz različitih stranaka i sa svih nivoa vlasti od kojih se može zatražiti da izvrše zakonodavne ili ustavne promjene.

Kancelarija Visokog predstavnika predlaže da Komisija bude uspostavljena na sljedećim osnovama:

- Zastupljenost u skladu sa posljednjim popisom stanovništva
- Zastupljenost svih stranaka koje imaju predstavnike u Gradskoj skupštini Mostara
- Zastupljenost na svim nivoima vlasti (Grad/Kanton/Federacija) koji su potrebni za donošenje izmjena zakonodavstva/ustava
- Odgovarajuća zastupljenost kako stručnjaka tako i političara

- Da se sastoji od najviše 12 članova.

Visoki predstavnik je sugerisao da članove Komisije predlože gradonačelnik i njegov zamjenik, a da ih imenuje Gradska skupština uz konsultacije s predsjednicima Vlada Kantona i Federacije. S ovim su se složili svi učesnici sastanaka održanih s Visokim predstavnikom u petak u Mostaru. Takođe je predloženo da sjednicama Komisije kopredsjedavaju četiri člana Komisije, po jedan iz svakog konstitutivnog naroda i jedan iz grupe ostalih.

Tokom susreta s gradskim zvaničnicima i delegatima u skupštini, Visoki predstavnik je rekao da će, ukoliko bude potrebno, međunarodni stručnjaci pomoći Komisiji ali da ne bi trebali biti njeni članovi – Komisija bi, rekao je, trebalo da se sastoji od pojedinaca koji imaju dugoročan interes za budućnost Mostara. U načelu, prvenstvena odgovornost je na građanima Mostara i njihovim predstavnicima.

Visoki predstavnik je rekao kako bi bilo idealno da Komisija počne s radom u aprilu te da sveobuhvatan prijedlog sačini do kraja jula ove godine. "Ovo je prilika da Mostarci sami odluče o budućnosti svoga grada, a Kancelarija Visokog predstavnika je spremna pomoći u ovom bitnom procesu", rekao je Visoki predstavnik.